

Inatsisartut inatsisaanni Inatsimmut § 2, imm. 1 ”nipilersornermi tunisassiornerup” ilassuteqaatigineqarnissaa pillugu Naalakkersuisut siunnersuuteqaqqullugit peqquneqarnissaannut Inatsisartuni aalajangiiffigisassatut siunnersuut, nunami inuutissarsiornerup siuarsarneqarnissaanut atatillugu nipilersornermi tunisassioriaatsip siuarsarneqarnissaa anguniarlugu matumani nipilersortartut inatsisitigut illersugaasumik atuisinnaanissaat anguniarlugu inuussutissarsiornermi aningaasaliiffigineqarnissamut periarfissaqarnerannut ersarissaanerussiaaq.
(Inatsisartunut ilaasortaq Aqqalu C. Jerimiassen, Atassut)

Akissuteqaat

(Inuussutissarsiornermut, Nukissiuuteqarnermut Iisimatusarnermullu Naalakkersuisoq)

Siullermeerneqarnera

Naalakkersuisut sinnerlugit Inatsisartunut ilaasortap, Aqqalu C. Jerimiassenip, aalajangiiffigisassatut siunnersuutaanut qutsavigaara.

Inuiaavugut nipilersornermik qangaaniilli tulluusimaarutigisatsinnik ileqqoqarluta. Nipilersornerup ataatsimuulersittarpaatigut. Peqatigisaanik nipilersorneq Kalaallit Nunaata nunarsuarmi nunap assinganiilersinnissaanut, aamma aningaasarsiutigisinnaasatsit, periarfissaavoq. Taamaattumik nipilersornermik suliaqartut Kalaallit Nunaannut pingaaruteqarput. Ilanngullugu erseqqissaassutigerusuppara filmiliornermik suliaqartut nunatsinnitsi kulturitsinnut inuussutissarsiuuteqarnitsinnullu assinganik pingaaruteqarmata.

Naalakkersuisut nipilersornermik suliaqartut annertuumik pingaartippaat, aammalu ataatsimiititaliap suliarinninneranut atatillugu siunnersuutit, aamma suliassa qarfinnut allanut ammaassiviusinnaasut, ammaffigalugit.

Nipilersornermik filmiliornermillu suliaqartut tapersiisarnernik aaqqissuussinerit Naalakkersuisut sinnerlugit Greenland Business-imit isumagineqartut iluaqutigalugit atorluarsinnaavaat. Tapersiisarnernik aaqqissuussinerit pingaartumik aallarnisaasunut nutaanik pilersitsisartunut nutaaliortunullu siunnerfeqartinneqarput. Tapersiisarnernik aaqqissuussinerit taakkua nipilersornermik filmiliornermillu suliaqartunut pingaartumik soqutiginaateqarsinnaassapput, tassami aningaasaqarnikkut tapersiisarnernup saniatigut inuussutissarsiuutigalugu siunnersuisartunit ikiorneqarnissaq periarfissaammat.

Siunnersuisartunit ikiorneqarnissamut taamaattumut periarfissaqarnermi, aallarnisaasut pitsaasunik isumassarsiaqartut immikkulluunniit pikkoriffeqartut, kisianni suliassap imminut akilersinnaasunnngortinnissaanut aningaasaqarnikkut nittarsaassisarnikkullu piginnaasanik pisariaqartunik amigaateqarsinnaasut tapersiivigineqarsinnaapput.

Tapersiisarneq nunami inuussutissarsiutinut tunngatillugu inuussutissarsiornermik siuarsaaneq pillugu Inatsisartut inatsisaat nr. 20, 3. december 2012-meersukkut maleruagassiivigineqarpoq, tassanilu piffissami matumani suliffeqarfiit kiisalu ingerlatsineq takornariartitsisarnerni, suliffissuaqarnermi, niuernermi, akunnittarfeqarnermi, IT-mi, misigisassarsiornermik inuussutissarsiorneq ilaalu ilanngullugit inatsisip atuuffiani ilaatinneqarput.

Taamatut oqaaseqarnikkut siunnersuut ilalerneqarpoq.